

Bil. 10

Isnin

1 April 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT PERTAMA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Kelewatan Pembinaan Masjid Kampung Parit Bintang
di Parlimen Parit Sulong**
- *YB. Dato' Dr. Noraini Ahmad (Parit Sulong)*

[Halaman 1]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Isnin, 1 April 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Isu Kelewatan Pembinaan Masjid Kampung Parit Bintang
di Parlimen Parit Sulong**

2.33 ptg.

Dato' Dr. Noraini Ahmad [Parit Sulong]: Terima kasih Tuan Yang di Pertua. Saya ingin merujuk kepada usul berkaitan isu kelewatan pembinaan Masjid Kampung Parit Bintang yang terletak di Peserai, Batu Pahat yang menjadi sebahagian dalam kawasan Parlimen Parit Sulong.

Untuk makluman, pembinaan masjid berkapasiti untuk 890 orang jemaah ini telah dimulakan pada 5 Januari 2017 dan dijangka disiapkan pada 4 Januari 2018. Kos pembinaannya adalah berjumlah RM1,699,159.26 dengan kontraktor yang telah dilantik adalah E One Multi Niaga dan bernombor kontrak, JC/T14/2016. Namun begitu, isu ini telah mula ditimbulkan oleh masyarakat setempat setelah pembinaan masjid ini hanya disiapkan sekitar 62 peratus dan lewat 28 peratus dari kadar yang sepatutnya disiapkan pada tarikh yang ditetapkan. Perkara ini secara tidak langsung telah meresahkan penduduk setempat memandangkan masjid ini menjadi keperluan buat mereka berikutan keadaan masjid sedia ada yang sempit serta agak uzur bagi menampung jumlah jemaah yang ramai di kawasan berkenaan.

Oleh yang demikian, saya mohon untuk mendapatkan penjelasan dari pihak kementerian yang bertanggungjawab mengenai beberapa perkara yang ingin saya bangkitkan. Pertamanya, apakah punca kelewatan pembinaan masjid ini sehingga ianya gagal disiapkan pada tarikh yang ditetapkan dan sejauh manakah pihak kementerian telah memantau perkembangan pembinaan masjid sejak dari awal pembinaannya?

Soalan seterusnya, sedikit kelewatan pembinaan masjid ini pastinya akan meningkatkan kos pembinaannya. Soalan saya, apakah justifikasi pihak kementerian dalam menjelaskan hal ini dan apakah pihak kementerian boleh memberi jaminan bahawa pembinaan masjid ini nanti dapat disiapkan dalam tempoh masa yang terdekat? Sekian, terima kasih.

2.35 ptg.

Timbalan Menteri di Jabatan Perdana Menteri [Datuk Wira Dr. Md Farid bin Md Rafik]: *Bismillahir Rahmanir Rahim. Assalamualaikum warahmatullahi wabarakatuh* dan salam sejahtera. Tuan Yang di-Pertua, pembinaan bagi Masjid Kampung Parit Bintang adalah berstatus dalam pelaksanaan, yang mana ia telah dimulakan pembinaannya pada 5 Januari 2017 dan tarikh siap asal adalah pada 4 Januari 2018. Walau bagaimanapun, disebabkan oleh masalah aliran tunai dan masalah pengurusan pihak kontraktor, telah menyebabkan berlakunya kelewatan pelaksanaan bagi projek ini dan pihak kerajaan telah sedaya upaya membantu untuk menyelesaikan masalah ini. Status kemajuan di tapak sehingga kini adalah sebanyak 85 peratus.

Untuk memastikan projek ini dapat disiapkan dalam tempoh masa terdekat, kerajaan dan pihak kontraktor telah membuat penjadualan semula bagi tempoh pelaksanaan projek ini dan tarikh jangkaan siap baharu adalah pada 31 Julai 2019. Penjadualan semula tidak akan memberi sebarang peningkatan kos terhadap projek ini. Kos pembinaan masjid ini kekal dengan RM1.69 juta. Agensi pelaksana *Johor Corporation (JCorp)*, dengan izin, akan memantau rapat projek ini melalui mesyuarat tapak secara bulanan dan pemantauan secara intensif bagi memastikan kontraktor dapat menyiapkan projek ini dalam tempoh masa yang ditetapkan. Setakat ini sebanyak 25 kali mesyuarat tapak telah diadakan sepanjang tempoh pelaksanaan projek ini. Sekian, terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 2 April 2019.

[Kamar Khas ditangguhkan pada pukul 2.37 petang]